

Aningaasaqarnermut Naalakkersuisoq

Ulloq: 29. november 2012

J.nr.: 01.31.06/12-00605

Aningaasaqarnermut Akileraartarnernullu Ataatsimiititaliap tallimanngornermi ulloq 23. november 2012-imi aalajangiineranik Naalakkersuisunut ilisimatitsineq (suliaq nr. 01.31.06/12-00605)

Tunisassiorfiit pillugit Royal Greenland A/S-mik 2013-imi kiffartuussinissat pillugit Isumaqatigiissutinut tapiliussatut isumaqatigiissut

Naalakkersuisut **inassutigaaat**;

- 2013-mi Royal Greenland A/S-imik kiffartuussinissamut akiliutit 7,2 mio.-iniit 3,2 mio.-nut ikilineqarnissaat Aningaasaqarnermut Ataatsimiititaliap akuerissagaa
- Piffissamut 2013-mut Royal Greenland A/S-mik kiffartuussinissat pillugit isumaqatigiissutinut tunisassiorfinnut makkununga TAPILIUSSAT Aningaasaqarnermut Ataatsimiititaliap akuerissagai: Ikerasaarsuk, Niaqornaarsuk og Kangaatsiaq.
- Royal Greenland A/S-mik kiffartuussinissat pillugit isumaqatigiissutinut TAPILIUSSAT ilanngunneqartut maannakkut isikkortik atuinnarlugu akuerineqassasut.

Aningaasaqarnermut Ataatsimiititaliap oqaaseqaatai

Kiffartuussinissamut isumaqatigiissummut atuuttumut tapiliussap akuerineqarnissaa Naalakkersuisut qinnutigaaat, taamaaliornikkut tunisassiorfinni sullississutinut Royal Greenlandimut akiliutit 2013-imi 7,2 mio. kr.-init 3,2 mio. kr.-inut ikilineqassallutik. Isumaqatigiissummut tapiliussaq malillugu tassani 2013-imi taamaallaat ilaatinneqarput Ikerasaarsuk, Niaqornaarsuk aamma Kangaatsiaq. Kiisalu iluarsiiisuteqartarnissaq ilanngunneqarpoq, tamatumani tunisassiorfinnut siuliani taaneqartunut naatsorsuutit naatsorsuutigisamit pitsaaneruppata Naalakkersuisunut utertitsissuteqarnikkut iluarsiiisuteqartoqarsinnaalluni.

Arsummi Kangaamiunilu tunisassiorfiit ukioq kaajallallugu ammasarnissaat tapiliussaq aqqutigalugu piumasaqaataajunnaartoq ataatsimiititaliamit maluginiarneqarpoq. Tamatuma nassuiaatigineqarnissaa kissaatigineqarpoq.

§ 4.1-imi oqaaseqatigiinni kingullerni allassimavoq: "Inernermit naatsorsuutigineqartumit 20 %-imit pitsaaneruppat, tamatuma tulliusutut KNNO-mut aningaasatigut sinneqartoortunik utertillugit akiliteqarnermik kinguneqassaaq". Oqaaseqatigiit itisilerneqarnissaat kissaatigineqarpoq.

§ 4.2-mi oqaaseqatigiit pingajuanni sisamaannilu allassimavoq: "...tamanna isumaqarpoq, taakkununga tunitsivinnut pingasuusunut, Ikerasaarsummi, Niaqornaarsummi Kangatsiamullu pitsaasumik ingerlatsinermit naatsorsuutiniq pissarsippata, ingerlatsinermit kiffartuussinermit isumaqatigiissummiit tapiissutit ilanngullugit 640.000 kr-init amerlaneruppata, aningaasat sinneruttut KNNO-mut utertillugit akiliutigineqassapput. Nalikkiliinerit, akissaajaatinut imaluunniit ataatsimoorussamik allaffissornikkut akissaajaatinut aningaasartuutit ingerlatsinermit naatsorsuutini ilaatinneqanngillat." Periutsip siuliani allassimasup qanoq atorneqalersaarnera itisilerneqassasoq kissaatigineqarpoq.

Aningaasaqarnermut Ataatsimiititaliap aalajangiinera

Apeqquutit siuliani allassimasut Naalakkersuisunit kingusinnerpaamik ulloq 7. december kalaallisut danskisullu akineqarsimanissaat assilineqarneratalu uunga nassiunneqarnissaa tunngavissaatillugu Naalakkersuisut inassuteqaataat Aningaasaqarnermut Ataatsimiititaliamit **akuerineqarput:** julie@inatsisartut.gl.

Ataatsimiititaliaq sinnerlugu

Andreas Uldum
Ataatsimiititaliap siulittaasua